

KDP - Uttale frå Manger IL

Generelt bed Manger IL om at kommunen går vekk frå det opplegget som no er skissert, der ein lagar ein samla plan for alle område innan kultur og idrett. Vi bed om at kommunen går tilbake til å laga ein eigen kommunedelplan for idrett, slik ein gjorde tidlegare. Hovudargument er at vi fryktar idrettsområdet får for lite merksemd med eit slikt opplegg kommunen no legg opp til. Vi fryktar og at ein slik felles plan fører til at ulike satsingar innan kultur og idrett no i større grad vil verta sett opp mot kvarandre, i staden for at idrett og kultur vert sett på som to sjølvstendige fagområde.

Når det gjeldt anleggsstrategien, bed Manger IL om at kommunen går tilbake på den nye vendinga der det heiter at «berre planlagde anlegg med konkret startdato» skal vera med i handlingsdelen i anleggsstrategien.

Det kan etter vårt syn verka som kommuneleiinga ser på anleggsstrategien berre som ei rein «venteliste for spelemidlar». Anleggsstrategien skal etter Manger IL sitt syn visa kva typar anlegg kommunen ønskjer å utvikla i dei ulike sentra i kommunen i åra framover – og kva anlegg kommunen meiner ein ikkje skal prioritera. Desse prioriteringane bør vera dei same uavhengig av kor vidt eit anlegg er finansiert eller ikkje. Manger IL meiner det framstår meningslaust å stryka anlegg ein meiner ein har brukt for, berre fordi om desse ikkje er finansiert eller har sett ein konkret startdato.

Erfaringa viser at det ofte er dei som klarar å finansiera sine anlegg privat som når fram i ordninga for spelemidlar, på bekostning av andre anleggstypar som eit område manglar. Manger IL meiner Alver kommune bør bruka anleggsstrategien mykje meir aktivt for å motverka dette. Kva anlegg som står i handlingsdelen bør utelukkande vera basert på behovsvurderingar. Anleggstypar kor behovet allereie er dekkja, bør ikkje få spelemidlar eller kommunale tilskot, før ein har på plass dei anleggstypene som manglar.

Vi viser her og til at dei kommunale anlegga må inn i kommunen sin fire års økonomiplan for å bli realisert. For kommunale byggjeprojekt gjeldt som hovudregel at planlegginga ikkje kan starta før det er gitt ei konkret økonomisk løyving i økonomiplan. Og ei slik løyving vil oftast verta styrt av kor vidt anlegget framstår i handlingsdelen. Det framstår urealistisk at kommunestyret skal løyva pengar til anlegg som ikkje og er med i handlingsplanen i deira eigen anleggsstrategi.

Når det gjeldt konkret anleggsutvikling, har Manger IL følgjande innspel;

For prosjektet nytt klubbhus med garderobar i Grønålen, er det no utarbeidd første utkast til teikningar (vedlagt). Idrettsbana i Grønålen har ikkje garderobar, og manglar toalett. Løysinga med sambruk med Radøyhallen er ikkje tilfredsstillande, og heller ikkje tilgjengeleg mykje av tida. For bortelag på kampar og cupar er ofte bensinstasjonen i bygda einaste alternativ. Tidlegare garderobeløysing i kjellaren på Radøy ungdomsskule vart tatt i frå idrettslaget grunna ombygging til skulen sin bruk. Alver kommune eig og driv garderobar for fotballen i Knarvik, Lindås, Ostereidet, Seim og Alversund kostnadsfritt for dei idrettslaga som driv i desse bygdene. Manger IL forventar likebehandling ved at kommunen er klar til å yta eit betydeleg økonomisk tilskot når idrettslaget er klar for å realisera eit byggjeprojekt. Alternativt at Alver kommune sjølv står for å byggja klubbhus/garderobebygg.

Manger IL forventar at Alver kommune no tek ansvar for turløypa kommunen eig i Manger sentrum. Vedlikehaldet av denne har vore meir eller mindre fråverande sidan anlegget vart tatt i bruk. Vi stiller oss undrande til at kommunen planlegg nye byggjeprojekt før ein klarar å ta vare på det ein allereie har.

Manger IL bed om at tilbodet i Radøyhallen, inkludert offentleg bading, ikkje vert forringa. Manger IL bed om at det vert sett i gang eit arbeid for å vidareutvikla Radøyhallen med meir allsidig idrettstilbod som fokus.

Mvh Manger IL styret